



MUNISIPALITEIT BEAUFORT-WES

Kennisgewing No. 04/2014



Die Raad van die Munisipaliteit van Beaufort-Wes publiseer die onderstaande Verordening vir algemene kennisname.

VERORDENING INSAKE OPENBARE OORLASTE EN OORLASTE WAT SPRUIT UIT DIE AANHOU VAN DIERE

Aangesien die Munisipaliteit van Beaufort-Wes ingevolge die Grondwet van die Republiek van Suid-Afrika (Wet 108 van 1996) wetgewende bevoegdheid het,

EN AANGESIEN die Munisipaliteit die reg het om sy eie Verordening insake Openbare Oorlaste en Oorlaste wat spruit uit die Aanhou van Diere te bepaal;

Kragtens die bepalings van Artikel 156 van die Grondwet van die Republiek van Suid-Afrika, 1996, verorden die Beaufort Wes Munisipaliteit as volg:-

AANHANGSEL

INHOUDSOPGAWE

1. Woordomskrywing
2. Oogmerke en toepassing

HOOFSTUK 1: ALGEMENE BEPALINGS INSAKE OPENBARE OORLASTE

3. Verbode openbare oorlaste

HOOFSTUK 2: ALGEMENE BEPALINGS INSAKE DIE AANHOU VAN DIERE

4. Toestemming om diere aan te hou
5. Planne vir strukture en bestuur
6. Oorweging van aansoek en oplê van voorwaardes
7. Sigbaarheid van strukture op persele
8. Kwytskelding van vereistes en intrekking van permitte
9. Geldigheid van permitte
10. Pligte van eienaar of bewaarder van diere
11. Diere wat op onbevredigende wyse aangehou word.
12. Afmaak en sterilisasie van diere
13. Handeldryf met diere

HOOFSTUK 3: BEPALINGS INSAKE AANHOU VAN HONDE, KATTE EN TROETELDIERE

Deel 1 – Algemene bepalings insake honde, katte en troeteldiere

14. Getal honde en katte
15. Telers van honde en katte
16. Telers van troeteldiere
17. Voorwaardes en beperkings
18. Terugtrek van toestemming
19. Honde of katte in openbare plekke

Deel 2 – Spesifieke bepalings insake honde

20. Beheer oor en lisensiëring van honde

HOOFSTUK 4: HONDEHERBERGE, KATTERYE, TROETELDIERSALONNE EN TROETELDIERWINKELS

21. Toestemming vir bedryf

HOOFSTUK 5: SAMEWERKING TUSSEN MUNISIPALITEITE

22. Diensleweringreëlings

23. Bevoegdhede van die Munisipaliteit in die geval van 'n nalate deur die Distrikmunisipaliteit

HOOFSTUK 6: ALGEMENE BEPALING

24. Reg van toegang en inspeksie

25. Betekening van dokumente en proses

26. Oorgangsbepalings

27. Appél

28. Strawwe

29. Vrystellings

30. Gemeenskapskakelforums

31. Herroeping van verordeninge

32. Kort titel en inwerkingtrede

1. **Woordomskrywing**

In hierdie verordening en tensy dit uit die samehang anders blyk, beteken: -

“agent” met betrekking tot die eienaar van eiendom, beteken 'n persoon wat deur die eienaar aangestel is om –

- (a) huur of ander betalings ten opsigte van die eiendom namens die eienaar te ontvang; of
- (b) om betalings namens die eienaar ten opsigte van die eiendom te maak;

“dier” 'n lid van die perdefamilie, bees, skaap, bok, vark, pluimvee, kameel, hond, kat of ander huisdier of voël of 'n wilde dier of reptiel wat in gevangenskap verkeer of onder die beheer van iemand is, of insekte soos, maar nie beperk tot, bye wat deur 'n persoon aangehou of beheer word, maar uitgesluit enige troeteldiere;

“distrikmunisipaliteit” die Sentraal Karoo Distrikmunisipaliteit gestig in terme van Artikel 12 van die Munisipale Strukturewet, 117 van 1998 en sluit in enige politieke struktuur, politieke ampsbekleder, raadslid, behoorlik gevolmagtigde agent daarvan of enige werknemer daarvan handelende ingevolge hierdie verordening uit hoofde van 'n bevoegdheid van die munisipaliteit wat gedelegeer of gesubdelegeer is aan gemelde politieke struktuur, politieke ampsbekleder, raadslid, agent of werknemer;

“dronk” 'n persoon wat weens die alkohol wat hy of sy ingeneem het beheer oor sy of haar geestes- of fisiese vermoëns, of beide, tot so 'n mate verloor het dat hy of sy nie in staat is om hom- of haarself te gedra nie, of nie in staat is om enige handeling waarmee hy of sy besig is op so 'n wyse te verrig dat dit nie 'n gevaar vir hom- of haarself inhou nie of met daardie agting vir die regte van ander soos deur die reg vereis word nie;

“eienaar”

- (a) met betrekking tot 'n dier, ook iemand wat in besit is van of belas is met die sorg, bewaring of beheer van 'n dier;
- (b) met betrekking tot eiendom, sluit in 'n okkupeerder, huurder, serwituuthouer, trustee, eksekuteur, curator of aangewysde, agent of administrator van sodanige eiendom;

“gemagtigde beampte” beteken 'n beampte, gemagtig ingevolge artikel 8 van die Dierebeskermingswet, 1962 (Wet 71 van 1962) en enige beampte van die munisipaliteit wat gemagtig is om die bepalings van hierdie verordening af te dwing;

“hondeherberg”, enige inrigting waarvan die besigheid die teel, aanhou of afrigting van honde is insluitend skutte hetsy dit deur die Staat of andersins bedryf word;

“kattery”, enige inrigting waar katte geteel word of aangehou word;

“munisipaliteit” die Beaufort Wes Munisipaliteit gestig in terme van Artikel 12 van die Munisipale Strukturewet, 117 van 1998 en sluit in enige politieke struktuur, politieke ampsbekleder, raadslid, behoorlik gevollmagtigde agent daarvan of enige werknemer daarvan handelende ingevolge hierdie verordening uit hoofde van 'n bevoegdheid van die munisipaliteit wat gedelegeer of gesubdelegeer is aan gemelde politieke struktuur, politieke ampsbekleder, raadslid, agent of werknemer;

“munisipale bestuurder” die persoon wie as die munisipale bestuurder van die munisipaliteit aangestel ingevolge die bepalings van artikel 82 van die Wet op Plaaslike Regering: Munisipale Strukture, 1998 (Wet 117 van 1998) en sluit enige persoon in:

- (a) wat in sodanige pos waarneem; en
- (b) aan wie die munisipale bestuurder enige magte, funksie of pligte delegeer het in soverre dit die uitvoering van daardie magte, funksie of pligte aangaan;

“perseel”,

- (a) grond of 'n gedeelte grond hetsy 'n gebou of struktuur op sodanige grond of gedeelte grond gebou of opgerig is; of
- (b) 'n gebou, struktuur, tent of woonwa saam met die grond waarop dit staan en sluit dit en sluit in enige voertuig, rytuig, skip of boot.

“openbare oorlas” enige handeling, versuim of toestand op 'n perseel met inbegrip van enige gebou, struktuur of gewas daarop wat die veiligheid van persone of eiendom in gevaar stel of wat onooglik, hinderlik, aanstootlik of rusversteurend vir ander mense is en **“oorlas”** het dieselfde betekenis

“openbare plek” enige plein, gebou, park, ontspanningsoord of oop terrein wat –

- (a) by die munisipaliteit berus;
- (b) die publiek die reg het om te gebruik, of

- (c) getoon word op 'n algemene plan van 'n dorpsgebied in 'n akteregistrasiekantoor van 'n landmeter-generaal en wat verskaf is vir of gereserveer is vir die gebruik van die publiek of die eienaars van erwe in sodanige dorpsgebied;

“**pluimvee**”, enige hoender, gans, volstruis, eend, duif, kalkoen, makou, tarentaal, pou of voël hetsy dit makgemaak of wild is.

“**ras**” beteken 'n populasie van diere wat aanteelt produseer met 'n hoë graad van genetiese stabiliteit soos gedokumenteer deur identifiseerbare eenheid in rasse standaarde en prestasie;

“**teler**” beteken die eienaar van 'n vroulike teeldier ten tyde van natuurlike of kunsmatige bevrugting of by geboorte van die aanteel;

“**straat**” enige pad, straat of deurgang of enige ander plek (hetsy 'n deurgang aldan nie) wat algemeen gebruik word deur die publiek of enige gedeelte daarvan of waartoe die publiek of 'n deel daarvan die reg van toegang het.

“**struktuur**”, beteken enige houer, stal, skuur, varkhok, kraal, voëlhok, kamp, bedekte struktuur, hoenderhok, hok, kamp, duiwehok of gebou wat gebruik word vir bewoning deur mense, sakedoeleindes of die aanhou diere.

“**troeteldier**” enige mak dier wat normaalweg in 'n huishouding aangehou word vir kameraadskap of vermaak;

“**troeteldiersalon**” beteken 'n onderneming waar troeteldiere versorg word;

“**troeteldierwinkel**” 'n onderneming waar troeteldiere aangehou word vir handelsdoeleindes;

“**verantwoordelike owerheid**” die Beaufort Wes Munisipaliteit of enige nasionale of provinsiale departement wat uit hoofde van sy funksies en bevoegdhede beperking of voorwaardes ten opsigte van die aanhou van diere mag opleë;

“**voël**” enige duif, pou, fisant, patrys, kanarie, budjie, papegaai, volstruis en enige ander mak of wilde voël wat in gevangenskap is of onder beheer van iemand is;

2. Oogmerke en toepassing

- (1) Die munisipaliteit, bewus van die grondwetlike reg wat elke persoon het op 'n omgewing wat nie skadelik is vir sy of haar gesondheid of welsyn, neem hierdie verordening aan met die doel die gesondheid en welsyn van alle inwoners te beskerm en te bevorder deur 'n omgewing te skep waarin die algemene publiek vrede en harmonie kan geniet.
- (2) By die implementering erken die munisipaliteit die infrastrukturele, maatskaplike en ekonomiese ongelykhede van die vorige plaaslike regeringstelsel en sal die munisipaliteit daarna streef om die ongelykhede te oorkom deur die nuwe doelwitte vir plaaslike regering soos bepaal in artikel 152 van die Grondwet te ondersteun.
- (3) Die bepalings van artikels 4(1), 14(1), 15(1), 21(1) en 26 is nie van toepassing op-

- (a) 'n perseel of grond wat vir bona fide landboudoeleindes aangewend word nie; of
 - (b) 'n perseel of grond wat deur die munisipaliteit geïdentifiseer is waar die aanhou van diere of die bedryf van troeteldiersalonne, troeteldierwinkels of honde- en katteherberge toelaatbaar is en as sodanig aangedui word in 'n goedgekeurde ruimtelike ontwikkelingsraamwerk of soneringskema.
- (4) 'n Persoon wie diere aanhou op persele soos bedoel in subartikel (3) word nie vrygestel van die bepalings van enige ander verordeninge van die munisipaliteit of wetgewing met betrekking tot die ontstaan of veroorsaking van 'n openbare oorlas nie.

HOOFSTUK 1

ALGEMENE BEPALINGS INSAKE OPENBARE OORLASTE

3. Verbode openbare oorlaste

- (1) Niemand mag 'n openbare oorlas veroorsaak nie.
- (2) 'n Openbare oorlas word veroorsaak deur, maar is nie beperk nie tot –
 - (a) die aanhou van diere of reptiele, uitgesluit troeteldiere, op 'n perseel tensy die perseel ingevolge 'n toepaslike dorpsaanlegskema gesoneer is vir die aanhouding van sodanige diere of reptiele;
 - (b) toe te laat dat 'n dier, reptiel of hond-
 - (i) op openbare of privaatgrond, wat nie die grond is waarop dit aangehou word nie, aanwesig is, tensy dit onder behoorlike beheer is, en in die geval van 'n hond, aan 'n leiband is nie;
 - (ii) aan 'n besmetlike of aansteeklike siekte ly; of
 - (iii) hom op so 'n wyse gedra dat dit 'n oorlas is vir aangrensende eienaars.
 - (c) in die geval van 'n persoon in beheer van 'n hond in 'n straat of op openbare grond, te versuim om die ontlasting van sodanige hond te verwyder;
 - (d) die aanhou van troeteldiere op so 'n wyse dat dit 'n oorlas veroorsaak of 'n potensiële oorlas veroorsaak word;
 - (e) die oornag parkering van meer as een swaar voertuig of boot op 'n perseel wat vir residensiële doeleindes gesoneer is;
 - (f) die parkering van 'n implement op 'n perseel wat vir residensiële doeleindes gesoneer is;
 - (g) die herstel, was, onderhoud of diens van 'n swaar voertuig, boot of implement op 'n perseel wat vir residensiële doeleindes gesoneer is;
 - (h) die parkering van 'n voertuig, swaar voertuig, boot of implement op 'n perseel op sodanige wyse dat dit die grense van die perseel waarop dit geparkeer is, oorskry;

- (i) die afvuur van vuurwerke op of oor privaatgrond op so 'n wyse dat die vuurwerk of gedeelte daarvan op aangrensende persele mag land;
- (j) die bedryf van 'n besigheid of die betrokkenheid by soortgelyke aktiwiteite op 'n residensiële perseel, nieteenstaande enige goedkeuring deur die munisipaliteit verleen in terme van stadsbeplanningswetgewing, op so 'n wyse dat 'n oorlas vir aangrensende eienaars veroorsaak word deur-
 - (i) die toename in die aktiwiteit tot so 'n mate dat die beperkinge en voorwaardes soos neergelê deur die munisipaliteit by die oorspronklike goedkeuring daarvan oorskry word;
 - (ii) die berging van goedere of materiale op die perseel;
 - (iii) die bedryf van 'n pomp, kompressor, waaier of soortgelyke masjinerie op so 'n wyse dat vibrasie of geraas op aangrensende persele veroorsaak word;
 - (iv) die gebruik van spuitverf of ander vlugtige stowwe op so 'n wyse dat sproei, reuke of gasse na ander persele versprei;
 - (v) die vervaardiging, of aktiwiteite verwant aan vervaardiging van goedere of materiale;
 - (vi) die frekwensie van aflewings of die aandoen van persone op die perseel;
 - (vii) die frekwensie van oplaai- en aflaai vanaf voertuie in die straat of op die perseel;
 - (viii) die samedromming van werknemers op of naby die perseel;
 - (ix) die frekwensie van aankoms, vertrek of parkering van voertuie in die straat of op die perseel wat verband hou met die aktiwiteite op die perseel;
- (k) toe te laat dat vakante grond of geboue-
 - (i) onooglik raak of aanstootlik voorkom of verval raak tot so 'n mate dat die waardes van aangrensende eiendomme nadelig geraak word;
 - (ii) 'n tuiste vir plakkers of leeglêers word;
 - (iii) oorgroei raak met verwaarloosde gras, bome, struik of ander bewerkte of onbewerkte plantegroei;
 - (iv) onooglik word deur 'n versameling van papiere, kartonne, tuinafval, rommel en ander afvalmateriaal; of
 - (v) 'n stortingssterrein word vir afvalmateriaal;
- (l) met betrekking tot besigheidspersone, toe te laat dat-
 - (i) afval wat op die perseel gegenerer word in 'n straat vullishouer gestort word;
 - (ii) afval wat op die perseel gegenerer word gestort word op 'n gedeelte daarvan wat toeganklik is vanaf 'n straat of sygaardjie, tensy dit gestort word in 'n vullishouer wat deur die munisipaliteit goedgekeur is;
 - (iii) goedere vertoon of verkoop word op 'n gedeelte van die perseel, wat nie deel vorm van 'n straat of sygaardjie nie, maar wat toeganklik is vanaf 'n straat of sygaardjie;
 - (iv) 'n voertuig geparkeer word op so 'n wyse dat dit of 'n gedeelte daarvan op 'n straat of sygaardjie uitsteek;
 - (v) 'n metode van reklame of promosie die effek het dat dit 'n verwarring of gevaar veroorsaak vir verbygaande verkeer of voetgangers, 'n

- samedromming van mense in die omgewing van die perseel veroorsaak, of dat voetgangers verhinder word om die sygaardjie voor die perseel te gebruik;
- (vi) winkeltrollies verbonde aan die besigheid in 'n straat of parkeerarea versamel tot so 'n mate dat voertuig- of voetgangerverkeer daardeur benadeel of in gevaar gestel word;
 - (vii) 'n verkoeler, kompressor, waaier of ander masjinerie bedryf word op 'n wyse wat vibrasie of geraas veroorsaak word op aangrensende persele;
 - (viii) 'n toename in die frekwensie van aflewings of aandoeners by die perseel tot so 'n mate dat die okkupeerders van aangrensende persele se normale toegang tot hulle eie persele belemmer word;
 - (ix) voertuie verbonde aan die perseel voor aangrensende persele geparkeer word op so 'n wyse dat okkupeerders verhoed word om met hulle normale aktiwiteite aan te gaan;
 - (x) enige stoep, veranda of steeg gebruik word vir die berging, opstapeling, storting, wegdoen, vertoon of hou van goedere of voorraad;
- (m) met betrekking tot algemene gedrag in strate, parkeervakke, parkeerareas en openbare plekke-
- (i) te skree, te gil, te fluit of enige ander geraas te maak om aandag te trek op so 'n wyse dat 'n oorlas daardeur veroorsaak word;
 - (ii) 'n voertuig tot stilstand te bring of te bestuur op 'n wyse wat voetganger- of voertuigverkeer belemmer;
 - (iii) fietse of soortgelyke toestelle in groepe te ry op 'n wyse wat voetganger- of voertuigverkeer belemmer;
 - (iv) trollies of soortgelyke toestelle te stoot of te parkeer op 'n wyse wat voetganger- of voertuigverkeer belemmer;
 - (v) in groepe te loop of te staan op 'n wyse wat voetganger- of voertuigverkeer belemmer;
 - (vi) goedere of items in kruisings vir verkoop aan te bied op 'n wyse wat die aandag van voertuigbestuurders aftrek;
 - (vii) dienste of goedere vir verkoop aanbied langs 'n pad op 'n wyse waarop voetganger- of voertuigverkeer belemmer word of die aandag van voertuigbestuurders afgetrek word
 - (viii) 'n voertuig wat deur diere getrek word te gebruik op tye en op strate waar hewige voertuigverkeer ondervind word;
 - (ix) in 'n beskonke of dwelmbenewelde toestand te verkeer op 'n wyse wat 'n oorlas veroorsaak;
 - (x) wanordelik op te tree;
- (n) die vertoning van enigiets wat visueel aanstootlik is;
- (o) die bedryf van enige toestel wat radio- en televisieontvangs versteur;
- (p) rondsientery in enige straat of openbare plek;
- (q) deur dronk of onder die invloed van dwelms te wees;
- (r) die uitlokking of oorreding van enige persoon vir die doeleindes van prostitusie of 'n ander immorele daad;

- (s) aan te hou om te bedel van 'n persoon of om 'n persoon te agtervolg nadat sodanige persoon negatief gereageer het op die bedelary;
 - (t) harde musiek te speel of die gebruik van musiekinstrumente op enige perseel op 'n wyse wat 'n oorlas veroorsaak;
 - (u) 'n persoon wat homself of haarself of enige dier was of bad in 'n openbare stroom, poel, watertrog, standkraan, fontein of op enige plek wat nie deur die munisipaliteit vir sodanige doel aangewys is nie.
- (3) (a) Waar daar 'n oortreding van enige van die bepalings van hierdie artikel plaasvind kan die munisipaliteit 'n kennisgewing op die eienaar of okkupeerder of beweerde oortreder beteken om binne 'n bepaalde tyd die handeling te staak of die oorlas uit die weg te ruim. By versuim om aan sodanige kennisgewing gevolg te gee en sonder inkorting van die munisipaliteit se reg om vervolging in te stel, kan die munisipaliteit alle nodige maatreëls tref om die oorsaak of bron van sodanige oorlas te verwyder en enige koste in verband daarmee aangegaan is deur die munisipaliteit verhaalbaar op die persoon wat verantwoordelik is vir die oorlas of die eienaar of okkupeerder van die perseel waarop die oorlas ontstaan of voortgesit word, ongeag of die eienaar of okkupeerder daarvoor verantwoordelik is aldan nie.
- (b) Waar enige beboude of onbeboude grond of perseel in die omgewing van 'n straat vir enige doel deur ongemagtigde persone gebruik word of dat enige van die materiale of dinge in subartikel (2) vermeld op sodanige grond of perseel geplaas of gestort word, kan hy skriftelike kennis aan die eienaar of okkupeerder daarvan beteken waarin daar van hom vereis word om die grond of perseel voor 'n bepaalde datum tot sy bevrediging in te sluit of te omhein. Elke sodanige insluiting of omheining moet van sodanige aard en so gebou wees dat dit die toegang van ongemagtigde persone daartoe of die storting of ophoping van materiale of dinge daarop sal verhoed.
- (4) Vir die toepassing van hierdie verordening word enige handeling of toestand wat die veiligheid van 'n persoon of eiendom in gevaar stel of wat onsinnelik, ergerlik, hinderlik, aanstootlik of rusversteurend is vir ander mense, as 'n openbare oorlas beskou.
- (5) 'n Persoon wat enige van die bepalings van hierdie artikel oortree of versuim om daaraan te voldoen, of versuim om aan 'n kennisgewing wat regtens daaronder uitgereik is te voldoen, is skuldig aan 'n misdryf.

HOOFSTUK 2

ALGEMENE BEPALINGS INSAKE DIE AANHOU VAN DIERE

4. Toestemming om diere aan te hou

- (1) Niemand mag sonder die skriftelike toestemming van die munisipaliteit enige diere, met uitsondering van troeteldiere, op enige perseel of eiendom aanhou of toelaat dat dit daarop aangehou word nie.
- (2) Enige persoon wat aansoek doen om 'n permit om 'n wilde dier aan te hou moet, wanneer so 'n aansoek ingevolge subartikel (1) ingedien word, die munisipaliteit

voorsien van 'n aanhoudingspermit wat deur die Departement van Ekonomiese Sake, Omgewing en Toerisme uitgereik is.

- (3) Bye mag slegs aangehou word op persele wat vir landboudoeleindes gesoneer is en die munisipaliteit mag die aantal byekorwe sowel as die tipe, getal, en geslag van diere wat aangehou mag word, bepaal asook die gebiede waarbinne die aanhou van sodanige diere en bye verbied word.
- (4) Ten einde 'n aansoek ingevolge subartikel (1) te oorweeg moet die munisipaliteit ook die insette en kommentaar van die eienaars of bewoners van omliggende residensiële persele bekom.
- (5) Enige persoon wat die bepalings van subartikel (1) oortree of versuim om aan 'n vasstelling in terme van subartikel (3) te voldoen, pleeg 'n misdryf.

5. Planne vir strukture en bestuur

Die munisipaliteit mag van persone wat aansoek doen om diere aan te hou vereis om 'n aansoekvorm in te dien en dat sodanige aansoekers gedetailleerde planne moet indien wat aan die munisipaliteit se spesifikasies moet voldoen.

6. Oorweging van aansoek en oplê van voorwaardes

- (1) Die munisipaliteit kan, na oorweging van-
 - (a) insette of kommentaar verkry ingevolge artikel 4(4);
 - (b) die ligging, geografiese kenmerke of grootte van die perseel ten opsigte waarvan die aansoek gerig word;
 - (c) die dokumente en uiteensettings ingevolge artikel 5 ingedien; of
 - (d) enige ander inligting wat op die aansoek betrekking het, insluitend maar nie beperk nie tot weiding, omheining en beskikbaarheid van water 'n aansoek weier of goedkeur.
- (2) Indien 'n aansoek geweier word, moet die munisipaliteit die redes vir sodanige weiering aan die applikant verstrekk en hom/haar terselfdertyd in kennis stel van die reg van appèl ingevolge artikel 27.
- (3) By die goedkeuring van 'n aansoek mag die munisipaliteit voorwaardes oplê.

7. Sigbaarheid van strukture op persele

- (1) Alle strukture waarin diere aangehou word moet toepaslik afgeskerm word van enige straat.
- (2) Enige persoon wat die bepalings van subartikel (1) oortree pleeg 'n misdryf.

8. Kwytskelding van vereistes en intrekking van magtigings

Nieteenstaande bogemelde bepalings mag die munisipaliteit, na oorweging van voorwaardes ten opsigte van die eiendom en op voorwaarde dat geen beswaar van die eienaars of bewoners van omliggende persele ontvang is nie, enige of alle vereistes van hierdie gedeelte opskort en ander voorwaardes instel, indien

toepaslik, en kan hy enige magtiging ingevolge artikel 6(3) intrek indien daar nie voldoen word aan enige voorwaardes daarin neergelê nie.

9. Geldigheid van magtigings

Alle magtigings om diere aan te hou wat uitgereik is ingevolge enige verordening of regulasie wat herroep word, sal geag word as sou dit ingevolge hierdie verordening uitgereik wees.

10. Pligte van die bewaarder van diere

- (1) Die eienaar van 'n dier of die persoon in beheer daarvan –
 - (a) mag nie veroorsaak of toelaat dat 'n dier die gewone gerief, gemak, vrede en rus van ander mense versteur nie;
 - (b) moet sodanige dier van slaapplek, skuiling, water en behoorlike kos voorsien;
 - (c) moet ten alle tye die perseel waarop 'n dier aangehou word en alle gepaardgaande toebehore in goeie en netjiese toestand hou om te voorkom dat 'n openbare oorlas ontstaan;
 - (d) moet beheer oor sy of haar diere uitoefen ten einde skade aan eiendom of tuine te verhoed; en
 - (e) mag nie enige dier op enige gedeelte van 'n openbare pad laat, toelaat dat dit op 'n openbare pad is nie en mag 'n dier ook nie op enige plek laat van waar dit op enige deel van 'n openbare pad mag afdwaal nie.
- (2) Waar enige van die bepalings van subartikel (1) oortree word, mag die munisipaliteit enige dier verwyder en 'n kennisgewing beteken aan die eienaar, okkupeerder of beweerde oortreder om te voldoen aan die bepalings van subartikel (1) binne die gestipuleerde tydperk;
- (3) Waar enige van die bepalings van hierdie verordening of wetgewing met betrekking tot die beskerming van diere oortree word, mag die munisipaliteit enige beampte van die Dierebeskermingsvereniging in kennis stel vir optrede in terme van die Dierebeskermingswet, 71 van 1962;
- (4) Wanneer die eienaar, okkupeerder of beweerde oortreder die munisipaliteit in kennis stel dat daar voldoen is aan 'n kennisgewing uitgereik in terme van subartikel (2), kan die munisipaliteit sodanige dier terugbesorg en die koste aangegaan deur die munisipaliteit van sodanige eienaar, okkupeerder of beweerde oortreder verhaal;
- (5) In die geval van nie-nakoming van die kennisgewing beteken in terme van subartikel (2), en sonder benadeling van die munisipaliteit se reg om vervolging in te stel, sal enige dier wat ingevolge subartikel (2) verwyder is as geskut geag word en sal die munisipaliteit se Skutverordening van toepassing wees;
- (6) Enige persoon wat die bepalings van subartikel (1) oortree pleeg 'n misdryf.

11. Diere wat op 'n onbevredigende wyse aangehou word

- (1) Wanneer ookal diere wat op enige perseel aangehou word 'n openbare oorlas is, kan die munisipaliteit by wyse van 'n skriftelike kennisgewing die eienaar of okkuperder van sodanige perseel aansê om die oorsaak van sodanige oorlas te verwyder.
- (2) Die munisipaliteit mag die stappe voorskryf wat geneem moet word of die werk wat gedoen moet word om die oorsaak van die oorlas te verwyder of an enige oorlas te verminder.
- (3) Enige aktiwiteite wat deur die eienaar in terme van subartikel (1) onderneem word is vir die eienaar se rekening.
- (4) Indien 'n eienaar versuim om die stappe in terme van subartikel (1) te neem, kan die munisipaliteit die nodige stappe neem en die kostes van die eienaar verhaal.
- (5) Enige persoon wat versuim om aan 'n kennisgewing in terme van subartikel (1) te voldoen, pleeg 'n misdryf.

12. Afmaak en sterilisasie van diere

- (1) Die munisipaliteit mag die afmaak of vernietiging van 'n dier gelas wanneer dit-
 - (a) gevaarlik of boosaardig is;
 - (b) sodanig beseer of siek is dat dit menslik sou wees om dit te doen.
- (2) Wanneer diere ingevolge subartikel (1) afgemaak word moet dit gedoen word deur 'n geregistreerde veearts of waar so 'n veearts nie beskikbaar is nie, deur 'n gemagtigde beampte met sodanige instrumente of toestelle as wat nodig mag wees en op 'n wyse geskied wat so min lyding as moontlik veroorsaak.
- (3) 'n Gemagtigde beampte mag 'n hond of kat laat steriliseer indien hy of sy dit nodig ag-
 - (a) vir die welsyn van die hond of kat;
 - (b) om 'n oorlas te voorkom;
 - (c) waar die hond of kat 'n rondloperdier is; of
 - (d) op versoek van die eienaar,
 en die koste van sodanige sterilisasie mag van die eienaar verhaal word.
- (4) Die eienaar van 'n gesteriliseerde hond of kat moet bewys van sodanige sterilisasie van 'n geregistreerde veearts verkry en dit op versoek van 'n gemagtigde beampte toon;
- (3) Enige persoon wat versuim om aan 'n bevel, soos beoog in subartikel (1), te voldoen of subartikel (2), (3) of (4) oortree, pleeg 'n misdryf.

13. Smous met diere

- (1) Geen persoon mag met 'n dier smous in 'n straat of openbare plek of vanaf 'n mobiele struktuur of 'n voertuig nie.

- (2) 'n Persoon wat subartikel (1) oortree is skuldig aan 'n misdryf.

HOOFSTUK 3

BEPALINGS MET BETREKKING TOT DIE AANHOU VAN HONDE EN KATTE

Deel 1 – Algemene Bepalings ten opsigte van honde en katte

14. Getal honde en katte

- (1) Behoudens die bepalings van artikel 15 mag niemand op enige perseel-
- (a) meer as twee honde; en
 - (b) meer as twee katte,
- aanhou sonder die toestemming van die munisipaliteit nie.
- (2) 'n Aansoek ingevolge subartikel (1) moet 'n uiteensetting bevat van die ras, geslag en getal honde en katte waarvoor aansoek gedoen word.
- (3) 'n Beperking wat ingevolge artikel 17 opgelê is op die getal diere wat op 'n perseel aangehou mag word, geld nie vir 'n tydperk van 10 weke vanaf die datum van geboorte van 'n werpsel van 'n dier wat met toestemming aangehou word nie.
- (4) 'n Persoon wat enige van die bepalings van subartikel (1) oortree is skuldig aan 'n misdryf.

15. Telers van honde en katte

- (1) 'n Teler van honde of katte wat meer as twee honde of katte wil aanhou moet die toestemming van die munisipaliteit verkry.
- (2) Enige persoon wat versuim om die munisipaliteit se goedkeuring in terme van subartikel (1) te bekom, pleeg 'n misdryf.

16. Telers van troeteldiere

- (1) 'n Persoon wat met troeteldiere teel moet aansoek doen om die toestemming van die munisipaliteit.
- (2) Die bepalings van artikel 5 is met die nodige aanpassing van toepassing op 'n aansoek ingevolge subartikel (1).
- (3) 'n Persoon wat die bepalings van subartikel (1) oortree, is skuldig aan 'n misdryf.

17. Voorwaardes en beperkings

Die munisipaliteit se toestemming ingevolge artikels 4, 14(1), 15(1) en 16(1) mag onderhewig wees aan sodanige voorwaardes en beperkings as wat die munisipaliteit in oorleg met 'n ander verantwoordelike owerheid mag nodig ag om op te lê.

18. Terugtrek van toestemming

- (1) Waar 'n persoon enige voorwaarde of beperking opgelê ingevolge artikel 17 oortree of versuim om daaraan te voldoen, sal die munisipaliteit geregtig wees om, nadat die persoon aangehoor is, sy toestemming terug te trek en die diere van die perseel te laat verwyder vir veilige bewaring deur 'n dierewelsynsorganisasie of skut.
- (2) Enige koste wat deur die munisipaliteit aangegaan is vir die verwydering en veilige bewaring van diere bedoel in subartikel (1) sal van die eienaar of persoon in beheer van sodanige diere verhaal word.

19. Honde, katte of perde in openbare plekke

- (1) Onderworpe aan die bepalings van die Verordening op Openbare Geriewe, mag die eienaar of bewaarder van 'n hond, kat of perd dit nie in 'n straat of openbare plek bring of dit toelaat om daar te wees nie tensy die hond deur 'n verantwoordelike persoon aan 'n leiband gehou word en die kat of perd onder fisiese beheer is van die eienaar of bewaarder daarvan.
- (2) Niemand mag 'n hond of perd binne 50 meter vanaf 'n kennisgewing wat die teenwoordigheid van 'n hond of perd verbied bring of toelaat dat dit daar gebring word nie;
- (3) Behalwe in die geval van 'n blinde persoon wat deur 'n gidshond begelei word, moet 'n persoon in beheer van 'n hond in 'n straat of openbare plek die ontlasting van sodanige hond verwyder deur dit in plastiek of papier toe te draai en te plaas in 'n houer wat vir rommel of vullis voorsien is.
- (4) 'n Persoon wat enige bepaling van subartikels (1), (2) of (3) oortree pleeg 'n misdryf.

Deel 2 – Spesifieke bepalings met betrekking tot honde

20. Beheer oor en lisensiëring van honde

- (1) Niemand wat die eienaar van 'n hond is mag-
 - (a) sodanige hond aanhou tensy 'n lisensiefooi wat deur die munisipaliteit bepaal is betaal is nie en sodanige persoon moet op aanvraag van 'n gemagtigde beampte die kwitansie vir sodanige betaling toon;
 - (b) toelaat dat enige hitsige teef sonder toesig in 'n straat of openbare plek is nie;
 - (c) enige hond aanspoor om enige persoon of dier aan te val, lastig te val of bang te maak nie, behalwe waar dit nodig is vir die verdediging van sodanige eersgenoemde persoon of sy of haar eiendom;
 - (d) 'n hond aanhou indien die perseel waarop die hond aangehou word nie behoorlik en voldoende omhein is om sodanige hond binne te hou wanneer dit nie aan 'n leiband is nie.
 - (e) toelaat dat enige hond waarvan hy die eienaar is of wat deur sodanige persoon aangehou word-
 - (i) op private eiendom oortree nie;

- (ii) 'n gevaar uitmaak vir verkeer wat enige openbare pad gebruik nie;
 - (iii) 'n bron van gevaar of besering uitmaak of na sy wete waarskynlik 'n bron van gevaar of besering sal uitmaak vir enige persoon buite die perseel waarop sodanige hond aangehou word nie, of
 - (iv) 'n bron van gevaar is vir die munisipaliteit se werknemers wat sodanige perseel betree met die doel om hul pligte uit te voer nie. 'n Kennisgewing ten effekte dat 'n hond op sodanige perseel aangehou word, moet op 'n opvallende plek vertoon word.
- (f) enige hond aanhou wat –
- (i) deur te blaf, te kef, te tjank of te huil;
 - (ii) in die gewoonte geraak het om af te storm op enige voertuie, diere, pluimvee, duiwe of persone buite enige perseel waar die hond aangehou word, of
 - (iii) deur hom op enige ander wyse te gedra, die gewone gemak, gerief, vrede of rus van bure weselik versteur nie.
- (2) Die munisipaliteit kan op enige hond wat in 'n straat of openbare plek gevind word strydig met die bepalings van hierdie verordening, beslag lê en skut.
- (3) 'n Hond wat kragtens subartikel (2) geskut is, kan aan die eienaar of bewaarder van so 'n hond vrygestel word teen betaling van 'n bedrag soos deur die munisipaliteit bepaal.
- (4) 'n Persoon wat enige bepaling van hierdie artikel oortree is skuldig aan 'n misdryf.

HOOFSTUK 4

HONDEHERBERGE, KATTERYE, TROETELDIERSALONNE EN TROETELDIERWINKELS

21. Toestemming om te bedryf

- (1) Geen hondeherberg, kattery, troeteldiersalon of troeteldierwinkel mag bedryf word sonder die toestemming van die munisipaliteit nie, welke goedkeuring aan voorwaardes onderworpe mag wees.
- (2) 'n Persoon wat 'n hondeherberg, kattery, troeteldiersalon of troeteldierwinkel bedryf mag nie toelaat dat die besigheid op so 'n wyse bedryf word dat dit 'n openbare oorlas of ongerief vir ander mense is nie.
- (3) 'n Persoon wat enige bepaling van hierdie artikel oortree is skuldig aan 'n misdryf.

HOOFSTUK 5

SAMEWERKING TUSSEN MUNISIPALITEITE

22. Diensleweringreëlings

Ten einde optimale dienslewering ingevolge hierdie verordening te verseker, kan die munisipaliteit ooreenkomste aangaan met die distriksmunisipaliteit met wie wetgewende en uitvoerende gesag gedeel word.

23. Bevoegdhede van die Munisipaliteit in die geval van 'n nalate deur die Distrikmunisipaliteit

Indien die dienslewering waarna in artikel 22 verwys word belemmer word deur die weiering of versuim van die distrikmunisipaliteit om enige van die reëlings wat in 'n ooreenkoms voorsien is, mag die munisipaliteit, onderworpe aan die bepalings van die Grondwet rakende samewerkende regering soos bepaal in artikel 41 van die Grondwet van die Republiek van Suid-Afrika, 1996, voortgaan en effek gee aan dusdanige reëling en enige uitgawes wat in verband daarmee aangegaan word van die distrikmunisipaliteit verhaal.

HOOFSTUK 6

ALGEMENE BEPALINGS

24. Reg van toegang en inspeksie

- (1) Enige behoorlik gemagtigde werknemer van die munisipaliteit is gemagtig om enige perseel binne die munisipale gebied te inspekteer ten einde te bepaal of daar aan die bepalings van die verordening voldoen word; met dien verstande dat 'n private woning nie vir roetine inspeksie doeleindes betree mag word sonder die toestemming van die eienaar of okkupeerder nie;
- (2) Wanneer 'n perseel ingevolge subartikel (1) binnegegaan word, moet die gemagtigde werknemer op versoek van enige persoon, hom/haarself identifiseer deur 'n geskrewe bewys van magtiging te toon.
- (3) Die gemagtigde werknemer mag vergesel word van 'n persoon van wie dit redelikerwys verwag word om te help in die uitvoer van die inspeksie.
- (4) Iemand wat versuim of weier om toegang te verleen aan 'n behoorlik gemagtigde werknemer van die munisipaliteit indien hy toegang tot grond of 'n perseel versoek, of wat hom dwarsboom of hinder in die uitvoering van sy pligte kragtens hierdie verordening, of wat versuim of weier om inligting te verstrek wat wettiglik van hom vereis kan word of vals of misleidende inligting aan sodanige behoorlik gemagtigde werknemer van die munisipaliteit verstrek, welwetende dat dit vals of misleidend is, is skuldig aan 'n misdryf.

25. Bediening van dokumente en geregtelike stappe

- (1) Wanneer enige kennisgewing, bevel, aanskrywing of ander dokument gemagtig is of nodig is om bedien te word op 'n persoon ingevolge hierdie verordening, word dit geag effektief en na behore aan sodanige persoon beteken te wees-
 - (a) wanneer dit persoonlik aan hom afgelewer is;
 - (b) wanneer dit by sy plek van inwoning of besigheid in die Republiek gelaat is by 'n persoon wat duidelik ouer as sestien jaar is;
 - (c) wanneer dit gepos is per geregistreerde of gesertifiseerde pos aan sy laaste bekende woon- of besigheidsadres in die Republiek en 'n erkenning van die versending verskaf word;

- (d) indien sy adres in die Republiek onbekend is, wanneer dit aan sy agent of verteenwoordiger in die Republiek bedien is op so 'n manier soos bepaal deur paragraaf (a), (b) of (c), of
 - (e) indien sy adres en agent in die Republiek onbekend is, wanneer dit opsigtelik vertoon word op die vaste eiendom, indien enige, waarop dit betrekking het.
- (2) Wanneer enige kennisgewing, bevel, aanskrywing of ander dokument bedien moet word aan 'n persoon sal dit nie nodig wees om hom by name te noem nie, maar sal dit voldoende wees as hy daarin beskryf word as die eienaar, bewoner of houer van sodanige vaste eiendom of ander reg, wat ook al die geval mag wees.

26. Oorgangsbepalings

'n Persoon wat tydens die inwerkingtrede van hierdie verordening meer diere aanhou as die getal in artikel 4(2) mag nie diere vervang wanneer een of meer daarvan te sterwe kom of weggemaak word nie.

27. Appèl

'n Persoon wie se regte geraak word deur 'n besluit van die munisipaliteit, kan teen daardie besluit appelleer ingevolge artikel 62 van die Munisipale Stelselwet, 32 van 2000, deur binne 21 dae na die datum van verwittiging van die besluit, skriftelike kennis van die appèl en redes aan die munisipale bestuurder te gee.

28. Strawwe

Iedereen wat enige bepaling van hierdie verordening oortree of nalaat om daaraan te voldoen is aan 'n misdryf skuldig en by skuldigbevinding strafbaar met 'n boete of gevangenisstraf, of gevangenisstraf sonder die keuse van 'n boete, óf beide sodanige boete en sodanige gevangenisstraf en in die geval van 'n voortdurende misdryf, met 'n boete vir elke dag wat sodanige misdryf voortduur; en 'n verdere bedrag gelyk aan enige koste en uitgawes wat na bevinding van die hof deur die munisipaliteit aangegaan is as gevolg van sodanige oortreding of versuim.

29. Vrystellings

Nieteenstaande die bepalinge van die verordening, mag die munisipaliteit enige persoon of klas van persone vrystel van enige of al hierdie vereistes en mag dit enige ander vereistes oplê wat dit as geskik beskou.

30. Gemeenskapskakelforums

- (1) Die Munisipaliteit mag skakelforums in 'n gemeenskap instel vir die doel om –
 - (a) geleenthede vir die gemeenskap te skep om deel te neem aan die aangeleenthede van die munisipaliteit;
 - (b) die bevordering van 'n veilige en gesonde omgewing;
- (2) 'n Skakelforum mag bestaan uit –
 - (a) 'n lid of lede van 'n belangegroep, of geaffekteerde persoon;

- (b) 'n lid of lede van die gemeenskap; en
- (c) 'n aangewese beampte of beamptes van die Munisipaliteit; en
- (3) (a) Die Munisipaliteit mag wanneer 'n aansoek om toestemming, permit of vrystelling sertifikaat oorweeg word ingevolge hierdie verordening, waar van toepassing, die insette van 'n skakelforum versoek.
- (b) 'n Skakelforum of enige persoon of persone gedoel in subartikel (2) mag op eie inisiatief, 'n inset aan die Munisipaliteit vir oorweging stuur.

31. Herroeping van Verordeninge

Die volgende verordening en die bepalings van enige verordening wat met die bepalings van hierdie verordening instryd is, word hiermee herroep:

Beaufort Wes Munisipaliteit:

Munisipale Kennisgewing No.	Provinsiale Kennisgewing No.	Titel	Omvang van herroeping
149/2005	Provinsie Wes-Kaap Provinsiale Koerant No. 6312 dateer 04 November 2005	Verordening insake die Voorkoming en Beheer van Openbare Oorlaste	In geheel

32. Kort titel en aanvang

Die verordening sal bekend staan as die Verordening insake Openbare Oorlaste en die Aanhou van Diere en tree in werking op die datum waarop dit in die Provinsiale Koerant gepubliseer word.

Munisipale Kantore
Donkinstraat 112
BEAUFORT-WES
6970

J. Booyen
MUNISIPALE BESTUURDER